



脈

貫

一

脈貫



序

陋菴居

蓋聞乾坤合德三才成焉陰陽

合理萬物育焉故天道則四時

行地道則萬物生人道則贊天

地之化育是故先聖以性道而

師天下之仁義軒岐以藥石而
治世人之沉疴然則大矣哉醫
之時用也獨是醫之為學有莫
難於察病機更莫難於明脈理
故曰脈之理微寡難言也昔在

黃帝生而神靈猶曰若窺深淵
而迎浮雲跡和有絕人之識纂
靈素難經為脈經而云胸中自
了指下難明叔微有穎悟之智
而云脈之理微幽而難明吾意



所解口莫能宣也繇是觀之古
先聖賢生而知之者猶有難之
而況於後學有困而不學者乎
推其意也徒汲岐黃之術以為
射利之資豈有濟世扶危之深

心壽國壽民之願乎王君世暎
習見此風特深憫恤因手著脉
貫一書稍佐渡世之津梁而為
俗學之指南也將見是書一經
問世則折衷有自蒼生得幸實

盛世壽國壽民之一助也余則
披覽之餘其中發奧闡微條紛
鏤析寔繼啓先賢燦明後學真
可謂醫學之條目脉理之綱領
也融會貫通則表裏精粗无不

到而全體大用無不明矣苟非
格物致知者孰能之乎噫先生
乃天民之先覺者也今將以斯


道覺後覺也

省

康熙辛卯歲仲冬月桐溪年家

眷同學弟顏福濟湖氏書於

陋巷居



自序

古今醫學典籍浩繁病機

脈理幽深夫醫學之要莫

先於切脈然脈理之精微

與蘊難明是非難辨先哲



每多明論殫其奧蘊辨其
是非但各著一書尚未能
互相闡發耳然則其微言
妙義載在諸書散漫難稽
矣苟非潛心篤學博覽羣

書烏能洞其玄微况有似
是而非之論難明又有數
候俱見異病同脉之感難
識使後學之士竟惘然莫
辨若切脉不真則病之虛

實不能灼見未有不攻補
之妄施者也此則失之毫
釐差於千里安能起沉疴
而拯司命之權乎余不揣
謏陋纂輯脉貫一書採集

羣書芟其繁蕪纂其奧旨
更以前賢所未發者略陳
管見以補未備其中互相
闡發剖析明盡雖脉理幽
深而難明精微實可一理

以貫通苟熟讀而深思旁
通而觸類自有神明之妙
不至迷途寔步而莫知適
從也已吾知是書之輯或
不能不貽笑於高明然以

濟世生人之意 亦未必無

小補云爾

寄

康熙庚寅歲暮春月穀旦

桐溪王賢世瞻氏書於

